



Inatsisartuni ilaasortaq
Knud Fleischer, Kattusseqatigiit Partiiat

Ilagiit sulinerat pillugu § 37 naapertorlugu apeqquteqaatit

Asasara Knud Fleischer,
Ilagiit sinniisaasa sulinerat pillugu apeqqutigisannut qujanaq. Apeqqutigineqartut tullinnguuttuni akineqarput.

Apeqqut 1: *Ilagiit sinniisasa qinikkatut suut akisussaaffigaat aamma suut pisussaaffigaat?*

Akissut: Ilagiit sinniisaat inuiaqatigiinni suliassanik pingaaruteqartunik amerlaqisunik suliaqartarput, kisiannili akisussaaffiinnut pisussaaffiinnullu ataatsimoortumik takussutissanik peqartoqarani. Ilageeqarneq pillugu Inatsisartut inatsisaata nr. 9, 19. maj 2010-meersup akuersissutigineqarnerata kingorna ilagiit sinniisaasa akisussaaffii pisussaaffiilu pingaarnertigut inatsimmi kapitali 5-imi takuneqarsinnaapput. (§§16-23) aamma § 30.

Tamatuma saniatigut saqqummersitami (ISBN: 978-87-92554-33-8) *Ilageeqarneq pillugu inatsit oqaaseqarfigalugu* Morten Nornildimit saqqummersinneqartumi qupperneq122ff aamma qupperneq 165-imi aalajangersakkat atuuffiinnut qanorlu atorineqarnissaannut assigiinngitsutigut assersuutissaqarpoq, akisussaannermi tunngavigineqartunut ersarinnerusumik isummersornerit arlallit ilanngullugit.

Ilageeqarneq pillugu inatsit malillugu toqqaannartumik toqqaannanngitsumillu suliassat saniasigut ilageeqarneq pillugu inatsisit immikkut ittut malillugit ilagiit sinniisaat allanik suliassaqarput. Taamaalillutik ilagiit sinniisaat Inatsisartut peqqussutaat nr. 8, 30. oktober 1998-imeersoq (kingusinnerusukkut allanngortinneqartoq) nalunaarutinilu atorineqarsinnaasut malillugit provstinik palasinillu toqqaasoqarnerani pingaaruteqartumik suliassaqarput. Nunatsinni iliveqarfiit isumagineqarneranni ilagiit sinniisaat immikkut ittumik aamma suliassaqartinneqarput, tamannalu takuneqarsinnaavoq Inatsisartut peqqussutaanni nr. 6, 17. oktober 1990-imeersumi nalunaarutinilu tamatumunnga attuumassuteqartuni.

Apeqqut 2: *Ilagiit sinniisaasa aamma prosteqarfiit, palaseqarfiit, biskopfeqarfiullu akornanni suleqatigiinneq qanoq ittoq ingerlanneqartarpa? Suleriaaseqartoqarpaa aaliangersimasunik? Imaluunniit suleriaatsimut najoqqutassanik peqartoqarpaa?*

Akissut: Apeqqutigineqartumi inuit oqartussaasut taaneqartut akornanni suleqatigiinneq ingerlatsivittut oqartussaasuni tunngavigineqartut malillugit ingerlanneqartarpoq. Tassalu assersuutigalugu allakkat attaveqatigiinnerillu pisortani aaqqissuussaannerit assigiinngitsut aqquusaqqaarlugit ingerlanneqartarput.

26. oktober 2012
Suliap normua. 2012-
066286
Dok. nr. 1044075

Postboks 260
3900 Nuuk
Tlf. (+299) 34 50 00
Allak (+299) 34 66 66
E-mail: ikinn@nanoq.gl
www.nanoq.gl

Apeqquut 3: *ilagiit sinniisaat qinikkatut sulinerminni qanoq aningaasalersorneqartarpat?*

Akissut: Ilagiit sinniisaasa sulinerat konto pingaarneq 30.18.02. aqqutigalugu aningaasaliissutit ilaannit (provsteqarfikkaarlugu) aningaasalersorneqarpoq.

Apeqquut 4: *Ilagiit sinniisaat qinikkatut qanoq aningaasatigut ajunngitsorsiassaqartinneqarpat?*

Akissut: Ilagiit sinniisaat ataatsimiinnernut peqataanerminnut provstit allaffiinit aningaasarsitinneqartarput. Akit atorneqartut qanoq annertutiginissaat ataatsimiinnerit sivilissusaasa aalajangertarpaat. Tamakku erseqqinnerusumik takuneqarsinnaapput *Provsteqarfinni ataatsimiitaliani ilagiillu sinniisaanni ilaasortanut qinikkanut ullormusianik, angalanermi ineqarnermilu iluarsiissutinik kiisalu sulinermit isertitassaraluanik annaasanut taartisiassanik tunniussisarneq pillugu Namminersornerullutik Oqartussat nalunaarutaanni nr. 32, 17. december 1996-imeersumi.*

Apeqquut 5: *Ilagiit sinniisaanni sulinerup inuusuttunut pilerinarnerulersinneqarnissaa aammakajuminnarnerulersinneqarnissaa pillugu naalackersuisut qanoq suliniuteqarpat? Imaluunniit tamanna pillugu suliniuteqartoqarpaa?*

Akissut: Ilageeqarneq pillugu Inatsisartut inatsisaata nr. 9, 19. maj 2010-meersup akuersissutineqarnerata kingornagut ilagiit qitiusumik aqunneqarnerat biskopimit isumagineqalerpoq, tassuunalu siornamut sanilliullugu annertunerusumik Kalaallit Nunaanni ilagiit namminneq aalajangiinnaassuseqalerput. Taamaalillutik ilagiit sinniisaasa suliniutaat ataasiakkaat, taakkununga ilaalluni inuusuttuaqqanut suliniuteqarneq, massakut ilagiinnit atsiorneqartarput Ilagiit pillugit Inatsimmi § 6-imi tunngavilerneqarluni nammineq aalajangiinnaassuseqarneq taaneqartoq malillugu.

Taamaattoq Naalackersuisut sulineq malinnaaffigaat annerusumik nakkutilliineq aqqutigalugu aammalu Naalackersuisut biskopillu ingerlaavartumik ataqatigiissaakkamik ataatsimiittarneri aqqutigalugit. Taamaaliornikkut qulakkeerneqarpoq naalackersuisoqarfiup iluani ataqatigiissaakkamik inuiaqatigiinnut suliniuteqartoqarnera, tamatumani suliaqarfii akimorlugit pilersaarutinut assigiinngitsunut ilagiit peqataatinneqartarlutik. Assersuutigalugu biskopip oqaatiginikuuaa Naalackersuisoqarfiup meqqanut inuusuttunullu periusissaanni peqataanissamik Kalaallit Nunaanni ilagiit soqutigisaqarmata.

Apeqquut 6: *Najungarisaaq qimallugu toqusoqartillugu sumiiffimmi ilagiit sinniisaat pisussaaffeqarpat?*

Akissut: Illoqarfigisap avataani toqusoqarsimatillugu ilagiit sinniisaat pisussaaffeqanngillat.

Apeqquut 7: *Oqaluffimmi qilaatersornerup ingerlanneqarnera sioqqullugu ilagiit sinniisaat tamatumunnga aaliangeeqataatinneqarsimappaat?*

Akissut: Apeqqutigineqartoq imatut paasineqarpoq, Sisimiuni oqaluffimmi arfininngorneq 15. september 2012-imi naalagiarneq eqqarsaatigineqartoq. Naalagiarneq qilaatersornermik erinarsornermillu ilaneqartoq Naalackersuisut biskopillu suleqatiginnerisigut ingerlanneqarpoq. Ukiumoortumik palasit aappassaannik

naapinnerannut atatillugu naalagiarnissaq aalajangerneqarpoq. Taamaaliornikkut palasit najuullutik sulisut misilittagaqarfigalugu qisuariarnissaat periarfissinneqarpoq palaseqarfinni ataasiakkaani ilagiit akornanni oqallinnissamut atorneqartussamik. Ilagiit pillugit Inatsimmi ileqquniluunniit piumasarineqanngilaq ilagiit sinniisaannik ataatsinik arlalinnilluunniit tusarniaasoqarnissaa suliniutinik nutaanik biskopimit taamaaliornikkut misiliisoqassatillugu.

Inussiarnersumik inuulluaqqusillunga



Mimi Karlsen